

Dikgang tse di Khutshwane tsa Kereke ya Lutere

Ferikgong 2012

Dipolelo tse dingwe tsa ga Henry C. Schwahn go tlhokomela pharologanyo ya tiriso ya molao le Efangele ka fa molaong le ka fa Efangeleng mo ditherong, mo dithutong, le mo ditirong tse dingwe tsa kereke, gongwe tsa phuthego ke tse:

Polelo ya 9

Tiriso ya molao le Efangele ka fa Efangeleng e dirisa molao go baakanyetsa Efangele manno mo pelong ya batho, mme ga o dirisiwe go tshegetsa tiro ya Efangele - gonne e lebelela leungo la Semowa mo Efangeleng fela. Ka moo e kgona go le lebelela, le go le letela.

Polelo ya 10

Tiriso ya molao le Efangele ka fa Efangeleng e a itse gore se se sa tsweng mo Efangeleng, gongwe mo tumelong, ga se leungo tota. Ka moo e ineela go belega bokoa, bosula, ee le maleo, mo boemong jwa go di tlosa ka mokgwa wa ka fa ntle fela.

Polelo ya 11

Tiriso ya molao le Efangele ka fa Efangeleng e itshwara tota, e tlhokomela mewa ka go dirisa molao le Efangele mo modumeding, mme go tlhotlhomisa, le go athola dipelo e go neela mo go yo o itseng dipelo.

Polelo ya 12

Tiriso ya molao le Efangele ka fa Efangeleng e tlhokomela thulaganyo e ntle fa gare ga batho - bogolo kgololesego ya bokeresete. Ka moo e tlogela tse di fa gare go nna tse di fa gare. Mo bofelong e di neela mo katlholong ya mokeresete go athola ka tsona ka fa segakoloding se se bofilweng ka Lefoko la kgololesego.

Polelo ya 13

Tiriso ya molao le Efangele ka fa Efangeleng e ikanyega mo go tse dinnye, e bile e tlhokomela tse dikgolo le tiro yotlhe bogolo go go tlhokomela kgato nngwe le nngwe.

Polelo ya 14

Go tlhalefa jaaka dinoga - go dira se se tlhokegang mo nakong e re tshelang mo go yona, - go iphemela mo go Satane gore a se re fenye - go nna tsotlhe mo go botlhe gore ka mokgwa yotlhe re pholose bangwe - tse ke tsa go dirisa molao le Efangele ka fa Efangeleng.

Polelo ya 15

Tiriso ya molao le Efangele ka fa Efangeleng e farologana le thuto e e sa batleng gore badumedi ba rutiwe molao, jaaka e farologana le ba ba di dirisang ka fa molaong.

Polelo ya 16

Ka tlwaelo ke tshwanelo gore tiriso ya molao le Efangele ka fa Efangeleng e tlhage mo kitsong le tumelo ya Efangele. Mme ga go diragale gantsi, le ka bonya.

Pitso ya senoto sa tikologo-moruti yo mogolo ya kwa Botswana

E ne e epiwa ka 19 November 2011 kwa Gaborone, mo go yona ga kgethwa rre moruti Buka Tsimako go nna moruti yo mogolo, le rre moruti Paul Mosenogi go nna moemedi wa moruti yo mogolo; borre Lame Seitiso le Boiki Modiakgetla go nna ditokololo tsa khuduthamaga ya tikologo ya moruti yo mogolo ya kwa Botswana. Rre Seitiso e bile ke tokololo ya khuduthamaga ya kereke, jaaka moruti yo mogolo le moemedi wa gagwe ka fa maemong a bone. Wa letlole la tikologo ga a ise a kgethwe. Ga begwa ka ga ditiro tse di farologanyeng tsa

tikologo, jaaka rre bišopo Dr. K. P. P. W. Weber a begile ka ga tsa kereke ya Lutere mo Borwa jwa Afrika. Dipegelo tseo tsa amogelwa ke pitso ka tebogo. Mo pegelong ya gagwe, rre bišopo Weber o umakile gore tikologo ya moruti yo mogolo ya kwa Botswana e tlhomilwe ka fa molaong pele ga dinyaga tse di 30. Moruti Häfner o ne a simolola go tsamaela ba phuthego ya kereke ya rona ba ba neng ba hudugetse kwa Botswana ka ngwaga wa 1972. Ka 28-30 April pitso ya khuduthamaga ya kereke e atlotse gore diphuthego tsa kwa Botswana di rulaganngwe go nna tikologo ya moruti yo mogolo. Mo pitsong ya khuduthamaga ya kereke e e neng ya epiwa ka 21-22 July 1981 moruti yo mogolo F. A. Häfner o setse a amogetswe, fa e le moruti yo mogolo mo khuduthamgeng ya kereke. Senoto sa ntlha sa tikologo ya moruti yo mogolo ya kwa Botswana bo epilwe ka September 1981 ka fa pegelong ya pitso eo ya khuduthamaga ya kereke.

Tsa tikologo ya moruti yo mogolo ya kwa Gauteng

Ka 30 October mo moletlong wa go gopola ntšhafatso ya kereke mo moletlong wa thomo wa tikologo ya moruti yo mogolo ya kwa Gauteng rre moruti Moses Danisa wa kwa Kahlehong o tsentswe mo boemong jwa gagwe jwa go nna moruti yo mogolo wa tikologo eo ka fa thulaganyong ya tirelo e e ntseng jalo ke rre bišopo Dr. K. P. P. W. Weber. Moruti yo mogolo Danisa a tsenya rre moruti John Nkambule yo e leng moruti wa diphuthego tsa kwa Naledi le Mohlakeng mo boemong jwa go nna moemedi wa moruti yo mogolo wa teng. A ba a tsenya yo o e leng wa letlole la tikologo ya moruti yo mogolo, e bong mme Winnie Maikwe, le mokwaledi mme Mokgosane, le moemedi wa gagwe, rre Moses Mosweu, le go tiisa rre N. P. Ntshoe go tswela go nna yo o emelang tikologo ya moruti yo mogolo mo khuduthamageng ya kereke.

Tsa “Lutheran Theological Seminary in Tshwane gongwe

Seminare sa Kereke ya Lutere mo Borwa jwa Afrika kwa Tshwane

Ka 28 November 2011 mogokgo wa seminare, e bong rre bišopo Dr. K. P. P. Wilhelm Weber a baya pegelo ya gagwe ka tiro ya seminare mo ngwageng wa 2011 fa pele ga pitso ya khuduthamaga ya seminare, (maina a “board of directors of the LTS” a bonala mo Alemanakeng ya 2012.) Rre bišopo a tshwaya maina a ba ba rutileng mo seminareng ka go lebogela tse ba di rutileng. Fano go umakiwa maina a baruti ba Kereke ya Lutere mo Borwa jwa Afrika ba e leng baruti ba seminare, e bong rre bišopo em. moruti Dr. D. P. Tswaedi, yo o rutang Matseno mo Testamenteng e kgologolo, le Dithuto le Tlhaloso tsa Testamente e ntšhwa le moruti M. N. Mntambo yo o rutang Sehebera le Tiriso ya theologi, le rre bišopo yo e bileng e le mogokgo wa seminare yo o rutang Maipolele le dithuto tsa kereke ya Lutere, le moruti Glenn Fluegge wa kereke e e bidiwang Lutheran Church - Missouri Synod ya kwa Amerika yo o ipofileng go dira dinyaga dingwe mo seminareng se yo o rutang Histori ya kereke le Segerika, le ba le babedi ba unibesiti ya kwa Pretoria ba ba thusang ka dithuto dingwe, jaaka mme Etienne Fourie yo o rutang Academic Skills, le mme Angelika Weber, yo o rutang Sejeremane. Mo godimo ga maina ao o umakile maina a ba ba 9 ba ba thusitseng go ruta dibekenyana. Ba umakiwa fa gore e ne e le bomang, le dithuto tsa bone: Randi Asberry: Tiriso ya Kategisima ya ga Luther; Stephen Rosebrock Thulaganyo ya Tirelo-Modi+mo le tsa Difela; Dr. John Kleinig: Dipesalome tsa Testamente e kgologolo, tsa botshelo jwa mokeresete; Dr. Anssi Simojoki: Histori ya kereke mo Aferika; Philip Ntsimane: Histori ya kereke mo Borwa jwa Afrika; John Pless: Boitsholo jwa mokeresete le thuto ya go ruta Kategisima; Dr. E. A. W. Weber: Histori ya Kereke ya Lutere mo Borwa jwa Afrika. Rre bišopo a leboga le bone thata mo pegelong ya gagwe.

A bua le ka ga tsholofelo ya gore moruti R. P. Ntsimane o tla boela mo seminareng, fa a fetsa tsa bongaka jwa theologi, le ya gore moruti Carl Rockrohr le mohumagadi, e bong Debora Rockrohr ba tla tla go ruta mo seminareng, mme Rockrohr gore a nne teng go simolola go ruta “deaconesses” mo tshimologong ya ngwaga o mošwa. A tshwaya le tiro ya mokwaledi, e bong mme Salomé Smith, le bathusi ba ba rileng ba ba neng go tla mo seminareng ka 2011 go thusa mo go tsa go rulaganya dikwalo le ditiro tse dingwe mo seminareng. A lebogela neo e kgolo e e filweng seminare, e bong dikwalo tsa rre Prof. Dr. Johannes Lombard le tsa rre moruti Heinrich Voges tse di tliseditsweng mo seminareng go bolokelwa teng le go dirisiwa ke barutwa le ba ba rutang, di kwadilwe sentle mo lenaneong la dikwalo tsa seminare, le go tshwaiwa ka dinomoro ke bathusi ba le, jaaka rre le mme Pat le Lee Hoffmeier, ba LCMS, le Christoph Dahl-Schmidt wa LKM, le bomme Ginger Taff-Lagergreen le Zeal Bealehas ba LCMS. A bega le ka ga tumalano fa gare ga seminare le unibesiti ya kwa Pretoria malebana le

tirisano fa gare ga tsona, le go naya barutwa phatlha go bona BTh, bogolo ka go na le tsholofelo, fa unibesiti e tla amogela moruti mongwe wa kereke ya Lutere, e le professor wa Lutheran Theology.

A tshwaya maina a barutwa ba ba 28, le a bahumagadi ba barutwa bangwe, a re: Ba ba 9 ba mo setlhopheng se se bidiwang “beginners course”; ba ba 6 mo go sona sa “main course”; ba ba 7 mo go sona sa “advanced- and post graduate course”, le ba ba 6 mo go sona sa “deaconess course”. Se se ledisang, ke fa e le bangwenyana fela ba ba tswang mo diphuthengong tsa kereke ya rona go ipaakanyetsa tiro ya go nna baruti mo kerekeng. Ka moo lo se ka lwa lapa go kopa Morena gore a rome badiri mo thobong ya gagwe, gonne thobo ya gagwe ke e kgolo le mo go Borwa jwa Afrika.

Tsa Deaconess Course

Mme Grace Rao wa LCMS World Relief & Human Care o ratile bomme ba kereke ya rona gabedi dibeke dingwe, e bong mme Esther Mathulwe, mme Maria Matlakala Phogojane, le mme Nancy Sephai ba kwa North West, le mme Sheila Letlole wa kwa Botswana, le mme Thembekile Buthelezi, le mme Thulisiwe Bhengu ba kwa botlhabatsatsi le KwaZulu/Natale. Ka 4 November mo tirelong Modimo mo kerekeng ya kwa St. Paul’s, Arcadia rre bišopo Dr. Weber o ba tshegofaditse go nna bo”deaconesses” (o ka re badiredi mo ditlalelong). Rre moruti vice president wa LCMS Herb Mueller o ne a rera mo tirelong eo.

Go fetsa ngwaga mo go LTS kwa Tshwane

Ka 24 November ga tswalwa ngwaga mo seminareng sa kwa Arcadia. Ga fetsa barutwa ba le babedi monongwaga, e bong Frank Kainerugaba noEnoch McBen ba kwa Uganda, ba kgona sentle mo go kalo gore ba tsewelele mo unibesiti ya kwa Pretoria ka ngwaga o o tlang.

Pitso e e epilweng kwa Oberursel ka 8-11 November 2011

Mo pitsong eo ga tlhatlhojwa tsa kagisanyo fa gare ga merape pele ga 1994, le go tlhatlhojwa gore kagisanyo e tswelediswa jang jaanong. Rre boišopo em. moruti D. P. Tswaedi le rre moruti R. P. Ntsimane ba kereke ya rona ba ne ba le teng, le rre moruti D. Schnackenberg wa FELSiSA.

Ka tsa Alemanaka 2012

Ke boitumelo, fa Almanac 2012 e setse e ntshitswe. Mo go yona go a bonala gore mo tikologong ya moruti yo mogolo ya kwa Botswana go na le ditikologo tsa baruti tse di 9; mo go ya kwa Gauteng tse di 9; mo go ya kwa-Zulu-Natala tse di 9; mo go ya kwa Botlhabatsatsi tse di 13; mo go ya kwa North West tse di 11. A mongwe le mongwe a tlathlobe tse di lebaganyeng le maina le tsa aterese, le tse dingwe tsa gagwe gore a bone gore di siame, gongwe nyaya, fa go Tlhokega sengwe mo go tsona a a itsise rre bišopo gongwe mokwaledi mo ofising ya gagwe gore go baakanngwe mo go ya ngwaga e e tlang, jaaka ke setse go kopile gore ka ngwaga o o latelang go tsenngwe nomoro ya mogala o mošwa mo go rona, e bong Tel. 034 815 0106. E bitsa R 50.